

O tostaat'oc'h Landréguer e kavis eur plac'hik ;
Koant vel eun zelik Doue, he hanno oa Metik
D'ar gouent a ze ive, doun d'ar studi,
He c'halonic oa mantret kement a va hini.

- « Salut deoc'h plac'h yaouank, a layariz dez-hi,
- « Evel d'oun oc'h ankeniet o kuitad tud ho ti.
- « Ho tornik flor em dornik laquet gant karantez,
- « Hac sesimp eureussoc'h o wela assamblez. »

Ar plac'hik a lavaras : « O cloarec Gwenole,
« Pedomp Doue alies an eil evit eguile,
« Er joa koulz hag en anken dalc'hit sonj a Vetik
« Euz a vremen da viken e ho mestrezik.

- « — O Metik va c'harantez rozen gaër Breiz-Izel !
- « War ho mignon Gwenole tolet breman eur zell,
- « Eur zell digand ho lagat a rañ eureusted
- « Keit a ma lezo Doue ac hanon war ar bed ».

Eru en kaër Landréguer, eru e penn hon hent,
Me eo kasset d'ar golach, ha Metik d'ar gouent ;
Ann disparti oa kalet c'hue o hag ankeniuz,
Ann eurusted er bed-mañ n'eo ket paduz !..

Dre ma chomiz er kolach skeuden dous Metik kez'
Eun deiz, eun noz diaison he deue aliez.
Neuze peden Doue ha Sant koz Breiz-Izel,
Vit ma vige en e buez, laouen euvreuz, santel.

II.

Pa eo achu va studi en hiz da Remengoll,
Da bedi c'hoas evit hi Gwerc'hez-vad *Remed-oll* ;
Seiz tro a riz d'an noter, devez ar pardoun bras,
Ha seiz tro d'an iliz zakr war ben ma zaoulin noaz.

Goude an offeren-bred, o pebeuz levenez !..
Er vered, gant e man ger, e velis Metik kez
Laouen eo evel an deiz, ha coant evel al loar,
Biscoaz penn-herrez ken koant n'euz bet war an douar.

Lugerni a re he zall, he diou chod gwen a ru,
He gueno vel eur rozen, he bleo, he lagad du,

Eur groas aour en he c'herc'hen, e c'hoef dantelezet
Lavaret vije eun æll euz an év diskennet.

« O pebeus joa evidomp va c'hloarec Gwenole,
« En em gaout en Remengol deis pardon mam Doue,
« Mam an oll dud ankeniet, Gwenole, ma mignon,
« Evidomp e pep amzer he fediz a galon.

« — Metik koant, setu aman, eur voalen aour,
« A roas din araog mervel Annaik va mam baour,
« Doug anezi var da viz, kemer hi digant en,
« Me dou war goaten ma mam d'ez karet da viken.

« — Ar groas aour zo em c'herc'hen a vo dit Gwenole
« Eur guchen euz va bleo a roan did ive :
« War ar groas e touan a dirac ar Werc'hes
« E vi karet gant Metik, 'tre ma vo en bue. »

Ha daoulinet en illiz, hon deuz gred eur beden,
A roet evit ofrans, eur c'houris koar melen,
Beniguet ho medalen, poket da relegou,
Da relegou Sant-Breiz karet gant ho tadou.

Goude hon euz baleet hon daou da Breiz-Izel,
Ha guelet kalz ilizou : kalz a dourio huel,
Abatti Dandevennec, ha mor Douarnenez,
Lec'h ma oa Ker-Is hag ar Brinces Athez.

Gwelet hon euz Mene-Hom, hag illiz veur Quemper
Mene-Bre, illiz Bulat hag hini Landreguer,
Kastel-Brest, Sant Ian-ar Biz, illiz Salaün ar-Foll
Ha kaera tour zo er bed, tour huel Kastel-Pol.

Gwelet hon euz Ker Ahès, Kerperle, Pont-n'Abat,
Fouenan, bro ar merc'het koant, Gwengamp hag Huel-
Montroulez ha Lan-Huon, Kroson a Lez-n'Even,
Kallak, bro ar gourino, Kastel-Lin, Rosporden. [goad

Klevet hon euz e krosal ar mor beg a Raz,
Biskoaz den naentremenaz eb santout aou pe c'hlas,
Bet omp en ene Sinun, en Roueseaz, Molenez,
En enez Vaz, er leodet, ive er Seiz-Enez.

Eur blavez omp bet euruz evel eal Doue,
A setu lec'h pa ho gwelet, an oll a lavaret ;
« Setu kloaret a Rinnou, soul evel eur serven,
« Setu Metik, he vestrez, fresq evel eur rosen. »

III

Devez pardon Sant-Herbot, e klevis eur c'helou,
En euz beuzet ma c'halon en eur mor a zaelou.
Gant e zad ha gant e mam, d'am mestrezik Metik,
E oa choaset da bried eur Pagan pinvidic.

Ar Pagan-se oa diot hep furnez, hep skiant,
Ne gare war an douar nemet ar gwin-ardant ;
Metik paour, pa e gwelet a grene gant ankrez ;
Hoguen, he zad oa dallet allas ? gant an danvez !

Mont a riz prim da gwelet neuze da Gerzanton,
Dre ma tostaen, em c'hreiz a grene ma c'halon ;
War dachen ar bourg e son e oa ar biniou,
Tud an eured a Metik beuset en he daelou.

Metik, a dreuz e daëlou a reaz ouzin eur zel
En eur lavaret *kouraj, mignon fidel* !

Monet a ra en illiz, lavaret ra d'ar belek :
Guenole eo a garan hag hen vo va fried !

Koueza raze d'an douar ractal ar ben-hervez,
Ha douguet eo dioc'h tu euz an illiz er mez ;
Dispak e c'hoef, he dillat, a dispak e bleo :
Seplantout a ra beza eun elik paour maro.

Mantret oll gant a glac'har e koueziz d'an daoulin,
En eur grial ; O Metik zell a drue ouzin ?

Pokat a riz d'he dornik d'he diou chod, d'he c'her-
O ! Metik ! Metik ! Metik ! pehini a garan ! [c'hen !

An disesper en dro din, evel eur vantel blom,
A chassas pell ac'hanon, pell war zu Mene-Hom,
Va skiant a zo kollet, va c'halon a zo ien,
O ! Metik ! Metik ! Metik ! pehini a garien !

Eiz-de goude, aseet e kreiz koat a Rannou,
War var diou chod a red diou feuteun a zaëlou.

Pa glevis e Remengol o zon anter-noz,
E lavariz esklamet : « Va Doue deoc'h bennoz,
« O Gwerc'hes vad Remengol, sellit ouz va glac'har,
« Aman oun deud da vervel breman war ho touar ;
« Varc'hoaz, pa zavo an heol, arc'hantet en envou,
« Didan an derven goz me a cavet maro !!!
« O Metik, va douzik koant, p'hini a garien,
« Kenavo larant dit er bed man da viken,
« Gant ar maro unanet, ni c'hoas en em garo.
« Kenavo er barados, kenavo, kenavo !!!!!...

IV

An de varlec'h da zao eol. eun durtzunel hep par,
A hirvoudé en derven he c'hlemou a glac'har :
Ar c'hloarek a oa maro gant an ankren,
Ea eur lavaret *Metik ! te p'hini a garien !*
Ar c'hloarek paour a starde c'hoas var e vuzellou
Kroas aour ha bleo du Metik glebiet gant e zaëlou,
War an derven doa skrivet hano e garante,
Ha diou galon unanet treuzet gant eur c'hlevé...
Kasset oa bet ar c'hloarek da vered Remengol,
Pa sebeliet e dishoet iliz zakr *Rémed-oll*
Iliz patronnez he vam en deuz bet ken karet,
Tud iaouanq a Vreiz-Izel, pedit vit-ham bepret.
Setu eta Gwenole en e wele douar !!!
Eur miz goude oe klevet hanadou glac'har...
Eur plac'hik gwisket en du en bered Remengol,
Deut di da bedi Doue ha Guerc'hes Remed-oll.
O tremen dre ar vered, velas var eur men be,
Skrifet neve flamm hanou he mignon Gwenole,
Epad an nos daoulinnet, Metik, wele dourek,
Ha d'ar men-be e poke, e poke kaloneq.
« O Gwenole, emezi, setu te en repos,
« En douar zakr Remengol ez out deut d'am gortoz,
« Mes ken ma starzo ann de, o ma muia karet,
« Er be-man, dre zorn Doue, ni vezo unanet !!!!!...

Da zav-heol, eur belék kos, vont da bedi Doue,
He c'hasas anter varo, gourveet war ar men-be :
Rei a raz d'ar plac'hik paour absolver a pardon,
Metik a varvas laouen, raktal, gant ran-kalon !...

En eur vogeden ezans ene gwen Metik kez,
Vel eur goulmik a nijaz d'ann ev gant ann celez :
Euz a Varados Doue eur goabren arc'hantet,
War tour iliz Remengol, neuze zo diskennet.

War ar goabren ar Werc'hes ha Sent kos Breiz-izel
Deus kurunen Gwenole, hac e vestres santel ;
Barzet an amzer gwechal, drant, war e sollennou
Da Zoue, en brezonnek, e gane ho gwersion,

Sebeliet he korf Metik, kichen koat Gwenole,
Ar maro deuz unanet an eil gant eguile,
Eur c'hloarek karantezuz deus war o be skrivet,
Ar c'homzo truezus man, gant e zaelou mesket.

« Aman repos en peoc'h kloarec Koat ar Rannou,
« Den a feiz hag a galon, den a garie e vro ;
« En e gichen eo kousket penn-heres Kerzanton,
« Metik an elik Doue, maro gant rann galon !!!

O Gwerc'hes mad Remengol, setu o taou buguel
Kousket en tall oc'h illis ha dindan ho askel ;
Vel eur vam kanrantezuz war gavel e mabik ;
C'houi dolo evez war be Gwenole ha Metik !!!

Kleier, ogrou Remengol, truezuz c'houi sono ;
Barset ha pelerinet, daelou c'hui a skuillo,
War be Metik Gwenole, pa refet ho peden,
Eur beden a garantez ha carguet a anken ?

Bevit e doujanç Doue, tud yaouanç Breiz-Izel,
Pedit Gwerc'hes Remengol, evit ma viot santel ;
Sonjit ive e Metik, sonjit en Gwenole,
Bezit evel the fidel an eil d'eguile,

Koat ar Ranaou (Rann, Rannou, chants, série) *bois des chants et des séries*. Koat Bras e dero, ezo en kichen ha d'ar zav-heol da illis Remengol, An Drouizet, beleien, ar Vre-

tonnet gwec'hal c'hoas, difeiza drec'he, bep bloaz, gant eur gontel aour, e koat an Rannou, eur louzouen, hanvet *huel var* p'hini a zav war an dero.

Barz, barze (Barde-poète). Beb bloaz ive en em gave e koat a Rannou hag e *Rumengoulou* hiriou hanvet Remengol, barzet ann Anvor. A re-ma oa tud a skient pere a gane gwerziou great gant-he, war an traou kaer erruet er vro, kana a rent ive meulodi Teutatès, doue faoz, pehini voa enoret elec'h man breman iliz Remengol. D'an hini vije hanvet Barz e roer eur gurunen dero hag eun delen aour, war p'hini a barz a gane e zoniou.

Gwenc'han Marzin, Taliezin, a oa barzet e Breiz-Izel kent ma teuaz en hini ar feiz kristen—Breman zo c'hoaz e Breiz kals Barzet, pere a laka o studi hag o foan evit kenderchel en hon touez ar feiz ha iez ho bro. En pen kentan eus ar barzet e man an aoutronez Kermaker, bars Breiz: an abad Herri, barz an Aviel: Troudec, barz ar Vugalegon; Kemar, per-on vikel-braz a escopti Gwenet, barz Sant-Gwen-Eel; an abad Klec'h, barz Rugolven, Karouantin Thomas, barz an Tourtan; Prosper Proux, e barz Kerne; An Hegarad, barz Ploue; I.-P.-M. Ar Scour, barz an Itron-Varia-Remengol; F.-N. An Huel, barz Ker-ar-Born; Ollivier Souvestre, barz Plouian; an abad Poulaouek, kure Landevenek, barz sant Gwenole, Karis, person Plougras, barz Menebre Guernison, barz Peravela, cals ar re all, peré o deus gret eun niver bras a verziou ha sonniou kaer.

- « Kanit a nezho, Breiziz, rag bea int gwerziou
- « Gret gant skiant a kalon, ha gant gwel vad komzou,
- « Gret in e brezonnek, mad nan e koz vrezounek,
- « Evel a re zo kals-ze brezonnek-gallek.

Barzet ha pelerinet, kanit gwerziou santel,
Kanit gloar ha meulodi da Vam tud Breiz-Izel;
Ho mam hag o Patronez, Rouanez ar bed-oll
Mam an dud paour ankeniet *Guerc'hez vad Remengol*.

I.-P. AR SCOUR.

Barz Itron-Varia Remengol.

(Propriété de l'auteur).

ANN HINI A GARAN

Voar eun ton nevez

An hini a garan, zo coant evel an eol,
Karantezus evel Gwerc'hez vad Remengol,

Doue Sent-Breiz Izel, Doue va zadou koz,
D'ann hini a garan, roit bepred ho penoz.

An hini a garan, zo douc evel al loar,
En noz pa sclerijen bugale an douar.

Doue Sent Breiz-Izel, etc.

An hini a garan, zo-vel eun alc'houeder,
D'am c'halon paour e kan zoniou, gwersiou tener.

Doue Sent Breiz-Izel, etc.

An hini a garan, zo vel eun durzunel,
Pa ve maro er far en em dol da vervel.

Doue Sent Breiz-Izel, etc.

An hini a garan, zo vel eun elik Doue,
Eun elik douc a ra joasted va bue,

Doue Sent Breiz-Izel, etc.

An hini a garan, zo douc e hano,
Evel ar mel eo mad, koant evel ar blennio,

Doue Sent Breiz Izel, etc.

An hini a garan, em c'ha'on a chomo,
Tre ma vin en bue a goude va maro,

Doue Sent Breiz-Izel, etc.

An hini a garan, gane-me en disheol,
A reposo eun deiz en bered Remengol,

Doue Sent Breiz-Izel, etc.

An hini a garan, en palez an Drindet,
Gane-me da viken a vo karet, karet,

Doue Sent Breiz-Izel, Doue va zadou koz,
D'ann hini a garan roit bepred ho penoz.

I.-P.-M. AR SCOUR.

Bars Itron-Varia-Remengol.

Lannion, librairie Mlle C. DUCHEMIN